

13 MAR 2002
DUTA-JERMAN/I
TIBA MASA BAGI MALAYSIA TONJOLKAN DIRI DI JERMAN

Oleh: Muin Majid

KUALA LUMPUR, 13 Mac (Bernama) -- Malaysia perlu menggalakkan pemasaran pelbagai peluang pelaburan dan perniagaan di kalangan pelabur Jerman yang berpotensi, yang juga secara aktif cuba dipikat oleh negara-negara lain di rantau ini.

Duta Jerman ke Malaysia Juergen Staks berkata peluang sedemikian yang terdapat di negara ini kurang diketahui oleh rakan senegarannya dan begitu juga dengan tarikan pelancong di Malaysia.

Dalam hal ini, beliau berkata Malaysia sepatutnya berusaha dengan lebih lagi untuk menarik perusahaan kecil dan sederhana (PKS) Jerman memandangkan terdapat banyak peluang yang mempunyai kelebihan di negara ini bagi perniagaan yang mereka ceburi seperti telekomunikasi berteknologi tinggi.

Beliau berkata demikian dalam satu temu bual baru-baru ini, sempena lawatan tiga hari Perdana Menteri Datuk Seri Dr Mahathir Mohamad ke Jerman mulai Isnin ini.

"Disebabkan oleh saiz dan belanjawan mereka, PKS Jerman akan pada mulanya melihat ke negara-negara Eropah Timur dan Russia yang kelihatan menarik pada masa sekarang bagi syarikat sedemikian," katanya.

Staks berkata Dr Mahathir sepatutnya menjelaskan perkara berkenaan semasa di Jerman, sebagai contohnya bahawa lawatan seminggu ke Malaysia akan membuahkan hasil bagi syarikat Jerman kerana pulangan yang diperolehi adalah lebih daripada memuaskan.

"Anda perlu lebih menyedari bahawa persaingan, bukan hanya di Asia tetapi juga di dunia, amat, amat kuat dan lain-lain negara dekat dan jauh dari Malaysia juga amat menarik kepada syarikat-syarikat Jerman," kata beliau.

Menurut kenyataan Wisma Putra, dalam lawatan rasmi yang pertama ke Jerman, Perdana Menteri dijadualkan melawat Munich dan Berlin di mana beliau akan menemui ketua-ketua perindustrian Jerman untuk membantu mengubah kesangsian dan maklumat salah yang mereka ketahui mengenai Malaysia.

Munich, ibu negeri Bavaria di selatan Jerman, merupakan kawasan perindustrian teknologi tinggi negara itu.

Juga, kekuatan Bavaria terletak kepada strateginya untuk menarik PKS dalam syarikat perindustrian, multimedia dan perkhidmatan baru.

Forum Perniagaan Malaysia-Jerman akan berlangsung di Munich, bertujuan untuk memaklumkan mereka yang terlibat dalam perniagaan di Jerman, khususnya mereka yang mewakili PKS, mengenai perdagangan dan pelaburan di Malaysia.

Dr Mahathir juga akan berpeluang "menjual" Malaysia sebagai sebuah syurga pelaburan semasa pertemuan dengan anggota Persekutuan Industri Jerman di Berlin.

Pelaburan semasa Jerman di Malaysia agak besar dan kira-kira RM6 bilion dengan 300 syarikat Jerman beroperasi di negara ini, kebanyakan dalam sektor elektronik, telekomunikasi, kejuruteraan, perubatan dan petrokimia.

Angka rasmi menunjukkan bahawa jumlah perdagangan dua hala ialah RM18.18 bilion pada 2001 dengan eksport Malaysia ke Jerman bernilai RM7.77 bilion dan import ialah RM10.41 bilion.

Staks berkata bagi syarikat-syarikat Jerman, adalah penting bukan hanya berniaga atau untuk melabur tetapi menggabungkan aktiviti berkenaan dengan pemindahan teknologi, pendidikan dan pembangunan sumber manusia.

Beliau berkata ini terbukti berjaya dilakukan oleh German-Malaysian

Institute di Cheras di mana rakyat Malaysia yang mengikuti kursus-kursus di sana diambil oleh firma Jerman.

"Bagi syarikat-syarikat Jerman, tentunya penting sekali untuk mengambil kesempatan terhadap tenaga buruh yang mempunyai standard yang tinggi, dan Malaysia boleh berbangga mempunyai tenaga buruh sedemikian," kata beliau.

Duta berkenaan, yang mula bertugas di Malaysia pada Februari tahun lepas, menganggap hubungan dua hala antara Berlin dan Kuala Lumpur adalah "amat baik" dengan dialog yang berterusan diadakan di semua peringkat sama ada sektor awam atau swasta.

"Kami tidak boleh menjalankan tugas yang baik di negara ini atau sebaliknya sekiranya kita tidak saling memahami," katanya.

Staks berkata tiba masanya pemimpin kedua-dua negara untuk bertemu bagi bertukar-tukar pandangan bukan hanya mengenai hubungan dua hala tetapi juga keadaan semasa serantau dan global.

Dr Mahathir telah mengadakan lawatan kerja ke Jerman 1988 dan 1998.

Bagi lawatan ini, beliau dijadualkan menemui Canselor Jerman Gerhard Schroder di Berlin serta membuka Kedutaan Malaysia di bandar raya bersejarah yang mengambil alih dari Bonn sebagai ibu negara Jerman pada 1999.

Selain daripada itu, penduduk Jerman juga akan dapat menyaksikan pertunjukkan kebudayaan Malaysia setelah Kementerian Kebudayaan, Kesenian dan Pelancongan akan mengadakan persembahan di beberapa bandar raya di Jerman. -- BERNAMA

MAM SD NHD